

Akambu wukuki antu ntsha weli lu Ekelezia ka Jesu Kristu

*« Dimi lambukufundela akambu ane, lambulungamela ndja le ye kem'edja. Keli naka dimi layutshikala etenyi k'utali, we ayeya akambu weli ololo antu ntsha lu luudu la Unyashungu, leli Ekelezia ka Unyashungu a lumu, ekoho la usuku w'akambu wa mete »
(1 Timote 3:1415).*

Kuyanga aui ane wakafundama le untu otoi, vo waki aui wakalangi Paulu antu tshe weli lu Ekelezia mbetshama. Kuyanga Ekelezia weli ului w'antu, shu tambetawo shati, untu la untu l'atei a ului uku eko la okende wa ndjela paka wetshelu w'apostolo. Vo wakalungula wetshelu uma le Jesu Kristu ndame. Nyukani yimba y'au aui ane lu Efeso 2:20. « Nya nyambuhikama ladiku dia tshina dia atumami la amvutshi. Jesu Kristu ndame keli dive dia wuki dia tshuku ».

Asika Kristu lu nshi ya apostolo wakashihudia vati, kuyanga untu la untu aki la okende a ndi ndame nkendakenda ololo la ntundu k'antu ndu Unyashungu, vo wakalimbetela vati, ului awo wakahumbi ndjala djimbitelu le antu wa la kete. Ekelezia akatatela l'antu lukama la akumi ahendi lu luudu la ladiku, keli kema edja « antu uku nunu satu wakasanganyema kame la wo », « la vo wakokolamela lu wetshelu wa atumami, ndu lu ekesanelu kawo, ndu lu **diatwela dia ma**, ndu lu dombelu » (Etsha 2:4142). Ului one w'uyuyu aki la ekesanelu ka lumu l'ulungu uma le Nyuma. Ekesanelu la Papa ndu l'Ona akatatela uma le Nyuma, la wulu a Nyuma wakeye mbakeketsha. Ekelezia kene k'uyuyu uku luudu la Unyashungu, ekoho la usuku w'akambu wa mete, waki la wulu wa ndjala uku emenyi wa wetshelu w'atumami lam'akawasangana kame. Uku luudu la Nyuma, elombedi wa Nyuma, vo wakeyi nambula elambu wa Nyuma, wa diandu la lusaka lu wulu a Nyuma. Uku asi khumbu ka Unyashungu, khumbu kakasumbama la dikila, wambuyala l'etshoko tshe w'ana w'ekito, vo waki la wulu wa ndjala djimbitelu ya atemodi wa Nyuma. Lu sacramento ka « Ma dia Khumadiondjo » vo waki la wulu wa ndjala emenyi a kame kakayala uma le Nyuma. Uku etemwelo k'ekila ka Khumadiondjo vo waki la diese dia ndjala emenyi wa akambu wa luudu la Unyashungu. Akambu aku weli ekila ka mete la dombelo. Djimbitelu diuleki uki di'ekesanelu ka lumu, ngandji la wulu eli diatwelu dia ma.

Shu talanga nshikeke dikambu dia kame diambenama lu diatwelu dia ma, ne dia nduku lusanganya lukina lambutenya wulu wa ekesanelu la kame ka untu l'untu l'unyandi. « Dikoho di'otshoko diatshokolasu, dio kema uku ekesanelu kasu lu dikila dia Kristu? Ukama watulasu vo kema uku ekesanelu kasu lu dimba dia Kristu? Ne dia shu antu efula, teko ukama wame, la dimba diame, ne dia shu tshe tatosaka uma l'ukama oto »i (1 Koreto 10:1617). Ekadimwelu k'au aui ane kambutenya: **Betsi efula, keli ukama otoi. Beke efula, keli dimba otoi.**

Okondo w'etatelu a « Ma dia Khumadiondjo » ambutanema lu Mateu, Mako ndu Luka. Keli undu aui wakafundi Paulu le asi Koreto lu dikambu dia diatwelu dia ma diambuleka ntukimanya dia nshihudia uki a dikambu ne lu lumu l'Ekelezia. Ne dia lu mukanda a Koreto Paulu ambutetsha wetshelu (Doctrine) wa Ekelezia uku ekesanelu k'asika Kristu lu kete nye.

Ma dia Khumadiondjo eli djimbitelu. Uku Batismu ambutukumia lu nyoi la Kristu mbala otoi ketu; Ma dia Khumadiondjo ambutuhula nyoi kandi tina tshe tambutusangana. Shu tambeta ma ne « Dia Khumadiondjo » dikambu dia aki Jesu ndame mbakakimo ma lutshu wakandakimwama (Ndi akafungama le Judasi, keli ndu Ndi akakimwama le Papa). Ndi akakimo djimbitelu ya ngandji kandi ne dia wane wambuwulanga wayali la dihuli dia nsangana dia mbuho nyoi kandi ndu dia menya wa la kete vati, vo wambusangana kame la Ndi lu nyoi edja ndu lam'ayundaya.

Lu lusanganya lone shu tambusangana aha paka dia mbuho nyoi la ngandji ka Jesu Kristu, keli dia ntemola. Ntemola eli na? Ntemola eli otshololo a l'utema le Unyashungu lam'alimbitela untu otshoko wambukuma le ndi. Ndi atutemolaka paka Unyashungu umbishi a etshoko tshe.

Undu aui weli lu Usambu a Davidi 45:1,2: wambuleka ntenya dikambu ne. « Dikambu dimotshi di'ololo diambulula l'utema ami, dimi luyanga nteketa akambu wakamalongosola dikambu dia khum'ekanga, lulimi lami leli uku lukala l'ufundji w'ololo. We kuleki ana apami w'antu dimena.». Ekilami wa Jesu watutemolaka Unyashungu ne dia vo wambulimbetela vati, vo wambusukana le Unyashungu uma la nyoi ka Jesu, la akolo awo wambudimanyema, wambeya ngenangena lu ngandji kandi, la wambuweya uku Papa.

Lu Daku di'Edjedja antu wakatemolaka Unyashungu, keli wakaleki ntemola diango diambenama, kakiane Unyashungu ambuyashula tshe le Kristu, la shu tambotemola lu Nyuma. Lu Daku di'Edjedja shu tambena didjidji kana esatu wa akambu wayuya. Lu Kristu shu tambena utundu, okone kakiane atemodi wa Unyashungu wambotemola uku an'andi wa ngandji. Lam'aki On'a Unyashungu lindu, Ndi akatemolaka Papa kandi, okone shu an'andi (wendi lumbeta « analingu ») ntemolaka uku ana, l'eyelu l'etema asu shu tambemala la ntundu ka Unyashungu « lu Kristu ». Shu tambukimo lusaka le Jesu Kristu ne dia ulimu akandakambi dia mbishula Papa lesu, la ne dia akambu w'ololo tshe wenasu le Ndi utshungudi asu.

Olombodi a diandu diasu eli Nyuma. Enda aui ane wa Paulu le asi Filipi, « Shu wanco watotemolaka Unyashungu la Nyuma ka Unyashungu, la watuyatumbulaka lu dikambu dia Kristu Jesu, **waha la elungamelu l'alimba** ». Diui ne eli mete dikambu diasu? Kana shu tambutatela nyanga untu dia ntolombola? Diui ne « Président » hatanema l'afundelu w'ekila.

Analingu lu Kristu, tambunyosengasenga dia ntsha paka dikambu otoi, nyutshi uku asi Beroya lu Etsha 17:11, « Wakayangiyangia la lushi la lushi lu afundelu, kana akambu ane mete kewe ». Nyetawo dia ndjala la dihunga dia atumami wa ntundu « dia nyukela uleki mbukela Unyashungu, nyusambuli nyame », (Etsha 4:19).

Diui ne « Président » eli lukumbu l'untu eli olombodi a kete uku Amerique, kana RD Congo. Keli shu tambetawo shati, lukumbu lone kema la dihuli l'elui w'asika Kristu. Tukani yimba y'au ane lu Mateu 23:8. « Nyu tshe nyeko antu la onangu ».

par Shutsha (Stewart Michie)